

EWU NGANYI?



Àkubènèshè, mwanèètù wa balùme. Mbîmpè be bwà kupetakù mpùngà wa kulwa mu nzùbù wa Mukalenge.

² Ngeela meeji ne mvwa munkaci mwà kulonga Mufùndù kampànda, kùkaadi cikondo kampànda, ne Wùdi wàmba ne pàakaseemenà Yesù pabwîpì ne Yèlusàlèmà, ne bayiidi bàakabàndisha mèsù e kumwènabò cimenga cyà cijila pa bule, ne kubangabò kusànka, ne kwamba ne: “Mpindyewu bukalenge nebwàkajuludiibwè.”

³ Ne muntu kampànda uvwa ulonda, anyi wakula bwà lwendu lwà musangu mushààlè lwà ku Pàlèstinà ewu, ki yèyè ne bantu abu patùdi twakulangana apa, mu cidimu cishààlè eci, mbafikè mu mùshindù wà ne, pàdìbò bàfùmìna mu cibandabanda ne bàtàngìla mu cibèndà, njila umwèumwè uvwa Yesù ne bayiidi bàsanganyibwa pa diinè dîbà adi, pàdìbò bàmòna cimenga aci, bàdi bàkùtula mwadi.

⁴ Nudi bamanyè's, ngeela meeji ne, kùvwa cintu kampànda cìvwa bayiidi abu, mu ôwò matùkù awu, cyàkuumvwàbo, cyà—cyà ne bukalenge bùvwa bufwànyine kwakajuludiibwa cyàkàbidi.

⁵ Kàdi mpindyewu dîbà dikaadi dyàmba kukùmbana. Nènku ndi ngeela meeji ne ki njiyà yidì mu bantu, yà ne bukalenge bùkaadi bwàmba kwajuludiibwa cyàkàbidi.

⁶ Mwanèètù Neville, mpaasàtà wètù wa musangèèlu ne mubènèshìibwè ewu, mmufùme ku diyikilangana naanyi bwà didyènzeja dyà ditabuluja didi dilwa kaaba aka mu tabernacle emu, mu ndambù wa malòòlò, bwà twàsambila bwà bwalu abu. Ki mèmè kumwambila ne, mvwa ngeela meji ne ncifwànyine kwikala cintu cibènèshìibwe.

⁷ Kanwènàku mwà kwenza matàbuluja kupìcisha bùngì to. Ne misangu mivulè tutu ne mmwènenu mubi wa ditàbuluja. Ditàbuluja kaditu nangàngà bwà kubweja bidimba bipyabipyà to, kàdi mbwà kufùululula citùkaadi naaci. Ne ndi . . .

⁸ Ndi muswè kwamba nunku, bwalu ndi ncyàmbila mu ndòndò wa mwoyi wànyì. Bwalu ndi mubangè kuumvwa njiyà mishìilàngàne mu nyùngulukilu wa tabernacle kutàmba mutùbi kùkaadi ntàntà mule, njiyà kampànda yà—yà cyumvwidi cyà ndòndò cyà nyumà, mùvwàbi kale wàwa, kùkaadi ntàntà mule; cintu kampànda cìkìsha, ne ciikàle ne cishìmikidi cilelèlè. Nènku ndi mutwishìibwe ne Nzambi neàbeneshè kaèkèleeziyà kakesè aka, ne . . . ? . . . cyàkàbidi mu bukòlè bwàku.

⁹ Ne ndi mmòna ndongamu wa diibaka ùya mutùngùnùke, ne ndi ngeela meeji ne ncintu cinène. Bwalu, nànsha ku tootooto nànsha ku ndandanda, twètù bakùlumpè netùtuulè byà mvità ne kubiteeka mu byanza byà bânà bèètù balela, ne kubànda Cibandilu cyà ngòlò aci.

¹⁰ Dìngà ditùkù mvwa musambùke mulongo wa munkaci awu mpindyewu, wà mvùla makùmi àtaanu awu. Ncyèna ànu mwà kucijingulula to. Kabyèna bìmwèka bu ne kùkaadi kupite cikondo kacya pâmvwà ngàmbwila Chris Meisner byàkudya apu, pâmvwà ne bidimu bitwè ku dikùmi ne mwandamukùlù, dikùmi ne bisambòmbò, anyi bidimu dikùmi ne mwandamukùlù. Kùdi bidimu biye ní nkwepi. Bìdi ànu bìleeja ne pànwapa katwèna ne cimenga cidì cishààla kashidi nànsha, kàdi tudi twenda tukèba Eci cicilwalwà. Ne aci n’Cimenga cidì Nzambì mwibaki, ne mwômò amu kamwàkwikalakù ndekeelu to.

¹¹ Mu dindà emu, pâmvwà ngààkula pa cyena-bwalu cyà Ditùkù dyà Baamaamù, ne nteeta bwà kutèèka maamù kabiyi mùdiye bulelèlè amu to, mukùlākājì, mwikàle ne minyèngù, ne byònsò ebi, ne mabaya èndè a balèmà, anyi dikalù dyà kale dyà balèmà, anyi mu nkwaswa wa mabòko, ne kanyingù kakesè kàà bilòngò ku lusekè kwèndè aku; kàdi maamù mu dibìikà dyà ku lufù, mwalujulula ku bunsongà bwèndè, ne mwimàne, ubàlakana bu mukalenge-mukàji. Ki mùshindù wùntù muswè kwela meeji bwà mààmù wanyì mèmè. Ncitu muswè kumwelela meeji mùshindù wùdiyè leelù ewu ewu to, mukùlākājì. Ntu muswè kwela meeji ku bicilwalwà. Ne ndi mumanyè ne nutu nuumvwa mùshindù awu bwà bèènu baamamwènu pèènu. Umwelela meeji bu mùdiye menemene mu mwoyi wèndè amu. Nànsha mùdi bààbùngì. . . mùdi mwedi wa kasàlà wàmba ne: “Nsòmbelu wa pànu kàvwa ànu mupeepèle bwèndè yèyè to, kàdi s’ùvwà mufwànyine kumubangulula cyàkàbidi, ànu bwà kukwenzelakù cintu kampànda.” Pa nànkù Nzambì neàmupengèlè njila bwà wàmònakù mwà kwikala ne mwoyi kashidi pàmwè neebè. Nènku mèmè ndi ne disànkà bwà bwalu abu.

¹² Ncyèna mumanyè ne mbwà cinyi to, bündi mwenzèle dimanyisha edi, mu dindà emu ne, nèngààkulè dilòòlò edi, bu Mukalenge mwà kwanyisha, pa: *Ewu Nganyì?* Ncyà bushùwà ne ncyèna mumanyè mungàapità naaci to. Kàdi mvwa ne byà dyenza bùngìbì too ne bu kùkaadi díbà dijimà ne tusunsa dikùmi nànkù awu, mu miyiiki yà bàbidi mu mapingaja mwònsò emu, ne mvwa ne mabìikila a pabwàwù ne—ne a lùkàsàlùkàsà. Ncìvwa mwà kubikùmbaja to.

¹³ Nènku ndi muswè bwà nwènu kutùngunuka ne kusambidila Ngàngàbukà Sam. Û—ùkadi wènda ùmvwa bìmpè, ne tudi ne kusàkidila. Ne Ngàngàbukà Baldwin ne Màndàmù Baldwin bàdi bònsò munkaci mwà kusàngala. Bàdi munkaci mwà kumvwa bìmpè.

14 Ndi muswè bwà nusakidilèku muntu mupyamùpyà ku bàà disambidila, mu mapingaja emu. Awu ki Harry Lease udi kwinsihì eku, mwenji wa manga a lwondàpù awu. Harry mmulundà wanyì wa katàpùlà-katèèka. Ne kacya ànu ngàmumanya, mèmè mvwa ngeela ne mmwena Kilistò, too ne mu mapingaja emu, pàvwà mwanààbò wa balùme mufile dilòmbà dyà disambila bwà lupàndù lwà musùùkà wèndè apu. Mwanèètù Mike Egan ngudi mutwàle. . . mulubuludi wetù ewu, ngudi mutwàle luumù alu. Ne Harry ùdi mu mùshindù mubi be, mu lùpitàadi mwàmwa. Ncìvwa mumanyè ne yèyè ùvwa ùntwa mushinga mùshindù awu to; kàdi, mmubènge mpaasàtà wèndè sungasunga, mu mapingaja emu, anyì mpaasàtà wa mu èkèleeziyà mùtùye ùtèndeleelela, kàdi ùkèba bwà mèmè kuya kamumòna. Nènku ndi muswè kuya kamumòna. Pa nàнку, nwàsambidilaayikù Harry.

15 Tudi ne disànka kaaba aka, dilòlò edi, dyà kutèèla diikalaku, dyà balundà bàànyì kaaba aka, bàà mu Géorgie mwàmwa, Mwanèètù Welch Evans ne dīkù dyèndè. Ndi kabidì mmòna, beenyi bakwabo, bàmvwà ncìyi mumanyè to, pàmwàpa bàvwà kaaba aka mu dindà emu.

16 Mèmè ncìyi mutùpàkàne to, ndi mmòna Mwanèètù wa balùme ne Mwanèètù wa bakàjì Elmer Collins paanyimà pààpa, bàà mu Phoenix, mu Arizona mwàmwa. Kaa, kwèna mushintùlùke to. Mbyenzè ànu bu ne bìvwa bikèngela wèwè kwikala muvwàle bilàmbà byèbè byà mu njila wa njanja abi, ne—ne ufùmina ku njila aku's. Nènku dyalukila dilenga kumbèlù's! Ncyèna mwà kunùlòmba bwà nùshaalè apa to, bwalu nudi bapètè mwaba mutàmbe bwìmpè, nwamònu's, wùdi mulenga be, mu Phoenix. Ndi muswè kusòmbelamù, dīngà ditùku, mèmè mwinè's.

17 Ne pashìishe nyewù mmòna Mwanèètù Smith mwab'ewu, wa mu Église de Dieu, kuntu kwàka. Mwanèètù Smith, bàvwà bampèèshè mèmè, kakàndà kèèbè kakesè aku, ditùkù adi, anyì makèèlèlè awu mu mapingaja, dībà dimanè kupita. Ncyèna mwanjì kukàbala to, kàdi ncyà bushùwà ne nèndeejè patòòke ne ndi mukitàbe, bwà pàndi ànu mumanyè ne wèwè ngudi mukàfunde. Bikèngela cīikalè Mufùndu wà cyà bushùwà, mulelèlè. Nzambi àkubènèshè. Ne ndi ntèkemena ne nekàtuuta dyàkalenga.

18 Ne bakwàbò bààbùngì, mùndi mufwànyine kwamba. Tudi tunùjingila bònso difika dilenga mu tabernacle emu. Nènku musambu awu wùvwà munsànkishe, mu dindà emu, wùvwà Mwanèètù wa bakàjì Stricker mwimbe awu ne: “Yèyè, mmumutàngidile mu kààdidiidiishi aku.” Bàna bèètù bàà balumè bàà mu ba-Mennonites aba, ndi ne disankà dyà kwikala naabò mwab'ewu. Ne, kaa, nwènù bònso's! Kudi mulundà wanyi mwab'ewu, ngeela meeji, ng'wa mu Illinois mwàmwa, mwanèndè wa balumè ùdi ùkwàta mikàbà yà mèyi paanyimà pààpa, ndyesà

bwa katwilanganaku naabò cyàkàbìdì. Ne bààbùngi be, ndi mufwànyine... Kwèdì meeji ne ndi mukupeepèje mèmè nciyi mukutèèle mu dìnà to, kàdì ndi ànu nnùjingila bònsò difika dilenga.

¹⁹ Mpindyewu túbalàayi dilòlòlò edi, bwà dileesònà dyà mu Mifundu, mu Maataayi nshapità wa 21, kubangila ku mvensà wa 1, tubala twenda tuya kwinshì, ne ku wa 11, mukumbajilakù.

Nènku pàakaseemenàbo pabwìpi ne Yelusàlèrà, kwàkalwa, ne bàakafika mu Betèfàjà, batàngile ku mukunà wà Olèvè, dìbà adi Yesù wàkatùma bayiidi bàbìdì,

Kubàmbilayè ne: Ndàayi mu musòkò wùdì mutàngilàngàne nèènù awu, ne dyàkàmwè nwènù nènùsanganè mpundà muswika, ne mwanèndè pàmwè nendè: nuyisùlulè, ne nuyiintwadilè kùneeku.

Ne muntu yéyè munwàsè bwalu, numwambilè ne, Mukalenge ngudi nàayi dijinga; ne dyàkàmwè yéyè neàyilekèlè.

Byònsò ebi byàkenjiibwa, bwà kuujiibwakù cyàkaakulàbo kùdì mupròfètà, wàmba ne:

Ambilaayi... bânà bàà bakàji bàà Sìònà ne: Mònà, Mukalenge wèbè ùlwalwa mu kalolo... musòmbe pa mpundà, ne mwànà wa mpundà awu.

Nènku bayiidi bàakaya, ne bààkenza mùvwà Yesù mubàtùmìne dìyi amu,

Ne bàakalwa ne mpundà, ne mwanèndè, ne bààkatèèka bilàmbà byàbò paanyimà pàayi, ne bààkamushikikapù.

Ne bantu musùmbà munène menemene bààkaadija bivwàlù byàbò mu njila; ne bààkakòsa bisààlà byà micì, ne bààkabyàdija mu njila amu.

Nènku musùmbà wà bantu bàvwà bàya kumpàla, ne bàvwà bàlonà, bàvwa bèèla mbilà, bàmba ne: Hòzaanà kùdì mwànà wa Davidi: Ewu udi ulwa mu dìnà dyà Mukalenge awu àbeneshiibwè; Hòzaanà mu myaba mitùmbùke.

Nènku pààkabwelàye mu Yelusàlèrà, cimenga cijimà cyàkanyunga, bàmba ne: Ewu nganyì?

Ki musùmbà wà bantu awu kwambabò ne: Ewu n'Yesù mupròfètà wa mu Nazàlèètà... .

Twìnyikàayi mitu yètù bwà disambila.

²⁰ Éyi Mukalenge, tudi ànu tudikonka citùvwà twètù bafwànyine kwikala bambè, bu ne tuvwa ne mwoyi mu òwò matùkù awu. Kàdì tudi ne mwoyi mu ditùkù ditàmbe kwikala dyà butùmbi, mutùdì bindile bwà kulwaYè. Nènku patùdì

munkaci mwà kudilongolola apa, Mukalenge, tulongolola myoyi yètù, ne tulwa ne bimpampa byònsò bitùdiku pèètù mwà kukungwija mu madimi à dinowa abi, ne kwètù ne ku bààbèndè, tudi twela meeji ne myoyi yizùka bwà díbà ditwàMumònà ùlwa, mubànde pà kabalù katòoke, ùtùùluke ùfùmina ku biibi byà Butùmbi, bwà kushintulula ne kulongolola mibidi yètù yà kale yìdi yìbolà eyi, mu mubidi wà butùmbi mufwànàngàne ne Wèndè sungasunga, mwìkalà kamùyì mwà kubwela nì mpèkaatù anyì cimanyinu cyà lufù nànsha. Nènku netùMumòne mùdiYe, ne netwìkalè ne mwoyi, ne kuMunanga munda mwà bikondo byònsò bìcilwàlwa.

²¹ Tudi tuKusàkidila bwà èkèleeziyà ewu ne bwà mpaasàtà wèndè, ne bwà balubuludi ne balami, ne bwà muntu yònsò udi ulwa kaaba aka awu; ne bwà beenyi bàdi batwèndèle, bàdi mìkòòkò yà mu cikùmbì cimwècimwè aci, kàdi bafùmine mu lùngà lupangu. Tudi baswè kulòmba bwà Ùbàbènèshèku, dilòòlò edi, ne Bwìkadi Bwèbè.

²² Nènku tùdiishèku ne Dìyì Dyèbè, bwà twamònakù mwà kuumuka kaaba aka, dilòòlò edi, ne dipàngadika dikolè dya kwìkala beena Kilistò bimpè kutàmba mutùvwà kwònsò eku. Swàku bwà tuye ne ditèkemena dipyadiyà mu mwoyi wètù, ne disanka, bindile Dilwa Dyèndè.

²³ Ku mpùùkàpùùkà kwòkò kufwànyine kwìkala munkaci mwètù emu, aba bàdi bàsaama ne mu ntàtu, katwèna baswè kupwa mwoyi bwà kubàsambidila to. Bwà ne bòbò... Pààbwelàbo mu citanda, mutùdi badìsangìshe bwà kukuukwila, dilòòlò edi emu, bàbwelamù, bàsaama, swàku bwà bàpatukè basàngàle.

²⁴ Kàbìdì tùdi baswè kulòmba bwà bàkaadi bènda bàsangaluka abu, ku mbànzà ne mu mpìtaadi, ne bàsanganyìibwa mu malààlù a babèèdi abu. Tudi tulòmba, Èyì Nzambì, bwà luse Lwèbè lùfikèku kùdìbo aku.

²⁵ Tudi baswè kusambidila aba bàdi kabàyi bàcyùka maalu, dilòòlò edi, bàdi kabàyi banjì kulabula ne kumòna ne Mukalenge mmwìmpè, bàdi kabàyi bamanyè cidì kwìkala munangìibwe kùdì Nzambì cyùmvwija abu. Kabèèna ànu bùùmvwa cidìbo bàpangila aci to. Èyì Nzambì, swàku bwà tudyòmba kampànda, anyì mùshindù kampànda, twàlengakù myoyi yàbò, ne masaluka àbò àkudimukilakù Kùdì kumpàlà kwà ciibi cyà luse kukàngiibwaci ne kubàkàngilabò pambèlù, bwà kukungamanganabò ne cilumbulwidi kakùyì luse.

²⁶ Tùkwàcìshèku, Mukalenge. Tudi tulòmba bintu ebi mu Dìnà dya Mukalenge Yesù, ne bwà butùmbi Bwèndè tudi tulòmba nùku. Amen.

²⁷ Bantu bàvwa bakungwile bapite bùngì ku biibi, ne misèèsù kayìyì pàà dyendela, ne kakùyìkù nànsha myaba ya bantu kulààlabò to. Bàvwa bàdyàdije pambèlù pàà cimanu, mu mbanzà

mwônsò, bwalu eci cìvwa mpaasàkà. Ne bantu bàfùmina ku myaba mimanyikè yônsò, bwà kukuukwila mu cikondo eci. Cìvwa ncikondo cìvwa mwànà wa mùkòòkò wà paasàkà ùshipiibwa. Ne... Cìvwa cileeva disùngidiibwa dyàbò dyà mu Èjiiipitù, ku bupika. Nènku bàvwa bàneemekela cyôci eci, ku cidimu ku cidimu. Ku cidimu cyônsò, paasàkà munène ewu ùvwa wènzeka. Nènku cìvwa ncimwè cyà ku bikondo bitàmbe kwikala byà mikùùkùkù byà... anyì maalu àvwa ènzekà a ntèndeelèlu wa beena Yudà, bwalu cìvwa cyùmvwija cikondo cyàkasùngidiibwàbo.

²⁸ Bantu bônsò bàtu banangè kwela meeji ku cyôci aci, ku cikondo cyàkasùngidiibwàbo. Mùshindù mwinè wùdiku yônsò wa kutùdì, dilòòlò edi, mwà kwalukila ku cikondo citwàkasùngidiibwà's wè! Mushinga wàci kutùdì's wè!

²⁹ Ndi mwà kuvùluka mu dilabula dyànyì mèmè mwinè, mùvwa mwoyi wànyì wà bwànà mukwàte ne byà luse awu wùjinga bwà kulenga Nzambì. Mèmè kudyàmbidila ne: “Kaa, ngìkalapù ànu mwà kubànda ne kukookola ku ciibi Cyèndè's, ne kwakulakù Nendè katanci!” Nènku, mu bushùwà bwà bwalu, nudi bamanyè bwalu-bulonda bwànyì abu. Mèmè kwangata dibèji ne crayon, nè nkààvwa mMufùndila mukàndà, bwalu ncìvwa mufwànyine kuyiikilangana Nendè to. Kàdi mvwa mumanyè ne Yéyè mmusòmbèle mu meetu amu, bwalu nkààvwakù muMuumvwè, ne nkààvwa mumòne dinyungakana Dyèndè mu diitu amu. Nènku—kajila kampànda, kàà ciibidilu kàà kale kâmvwà ntàmba kwendela pamvwa nya kalemba nyama anyì kalòbà. Mèmè kudyàmbidila ne: “Nèngùlamikè ànu ku mucì, ngùfùndilè Mukalenge Yesù.” Ànu mùshindù kampànda wà ne bujitu abu bwàmònakù mwà kunguumuka pa mwoyi.

³⁰ Kaa, dilòòlò adi, kuntwaku's! Ndi mufwànyine kupwà bidimu byànyì mwoyi, mîngà misangu ndi mufwànyine kupwà mène ne dîna dyànyì mwoyi, kàdi ncyènàku mwà kupwà mwoyi dîbà dyàkansùngilàYe ku mpekàatu adi to. Cintu kampànda cyàkenzeka, munda mwànyì emu, cìdì cinkwàcisheku mu bikondo bikolè byà mîdìmà. Dîbà dyà disùngidiibwa dyànyì, majitu à mpèkaatù àkannguumuka, ne mèmè kulwa muntu mupyamùpyà. Ndi cifukùibwà cipyacìpyà mu Kilistò Yesù, kubangila ànu apu.

³¹ Nènku beena Yudà aba, bàvwa bàlwa, ku cidimu ne ku cidimu. Ne kùvwa m—mpokolo kampànda munda mwà èkèleeziyà amu. Nènku bàvwa bàngata dyàmpà adi—adi, ne bisoosà byà bululu, ne mwànà wa mùkòòkò, ne bànwà màyi à ku mpokolo ewu munda mwà èkèleeziyà amu. Nènku bàvwa bàsanka pàmwe bwalu Nzambì uvwa mubalèjèjè luse. Pa nànkù, bu mùdi eci ciikàle cikondo cyà paasàkà, ne kaciyi ànu paasàkà cyanààna to, kàdi cìvwa mpaasàkà wa pabwendè.

32 Nudi bamanyè's, kùdi misangu mikwàbò yitùyaaya mu èkèleeziyà ne. . . Tutu misangu yònsò banangè bwà kuya, kàdi kùtu misangu mikwàbò yitù cintu kampàndà cyà pabwàcì cyènzeka.

33 Nènku eci cìvwa cìmwè cyà ku byôbì bikondo abi. Mu kapeepà mùvwa mwònsò mùle tètè ne myoyi yizùka, ànu mùdìbi leelù ewu emu. Mèsù ònsò a bàvwa baMunangè àvwa mindile bwà kubwelaYè mu ciibi aci.

34 Nènku ndi ngeela meeji bìdi menemene mùshindù awu leelù ewu, bwalu aba bàdi baMunangè mbaMwindile. Mu kapeepà mmùle tètè ne dindila ne myoyi yizùka.

35 Pàdìbi ne, tudi ne mwoyi mu ditùkù edi, mùdi buloba bwikàle cyà bushùwà, bushààle ànu kalòndò kanènè kàà mpuutùlù. Ne maalu a mamanya adi àtwàmbila ne: “Kùdi tusunsa ànu tusàtù tushààle bwà dîbà mundankùlù.” Ne ndi mutwishìlwe ne nuvwa nubala, bu mèmè kùnu, ditùkù dikwàbò, bwalu-bulonda bwa kalààlà kàà màsàlaayi aku mu cilwilu, mwambiyè, ne: “Bu kwòkò mwà kwenzeka mvità mikwàbò, mmifwànyine kunènga ànu tusunsa túbìdì anyì tusàtù cyanàànà.” Matùkù a kale à dílwà dyà mvità, ne dyasangana dyà bingoma, ne dyumbula dyà meenà a kusokomena awu, àkaadi majikè. Bàdi bàmba ne mvità yàlonjà neyènzè ànu tusunsa túbìdì anyì tusàtù cyanàànà. Dìngà ditùkù, muntu kampàndà munwìne kutùbùke neàtololè cijikù ne kutùdishà kapyà kàà bumwè bwà ku bòmbè ayi. Ne pènzàbu nànkù, twètù tudi ne myaba yà ditèèlejila, myaba yònsò, bwà kubwàluja kàbìdì dyàkàmwè. Buloba kabwàkushààlakù paanyimà pàà bya nanku abi to.

36 Bantu bònsò ku paasàkà aku bàvwa bamanyè ne cintu kampàndà cìvwa ne cyà kwenzeka, kàdi kabàyi bamanyè ànu ne cìvwa ncinyi to.

37 Nènku ki mùdìbi leelù ewu. Bantu pàmwè ne bònsò mbamanyè ne cintu kampàndà cidì pabwìpi ne kwenzeka. Mbamanyè bònsò nànkù. Udi mwà kuyiikila ne ngènzàmpèèkààtù, udi mwà kuyiikila ne ngèndààmùshingà, udi mwà kuyiikila ne muntu kànà yònsò, kàdi, kaa, s'ncikondo ànu cyà mùkwatà-mùkwatà bwà bàà pa buloba.

38 Kàdi udi mwà kuyiikila ne mulumè anyì mukàjì udi mwindile bwà kulwaYè, butùmbi bùdì pa mpàlà wendè, ùbàlakana. Mmwindile bwalu bunènè bwà mikùkùku abu. Pa nànkù mu kapeepà mwònsò mmùle cyàkàbìdì, bindile bwà cintu kampànda kwenzekaci. Bàà pa buloba kì mbamanyè ne cidì pabwìpi ne kwenzeka ncinyi to, kàdi Èkèleeziyà wa Nzambì udi ne mwoyi mmumanyè ciikalà mwà kwenzeka. Bòbò mbamanyè ne àbìdì aa mpungi neàdìlè, ne twètù netùMumònè ùlwa, ùpàtukila mu Butùmbi, mubànde pa kabalù katòòke, ne bilwilu byà mu Dyulu byènda bìMulonda. Ne aba bàdi bafwè mu

44 Kùkaadi ngondo mitwè ku yisambòmbò, ngeela meeji, mwwa munkaci mwà kufila bujaadiki kùdi bantu kampànda. Ki mèmè kwamba ne: “Kaa, pa kukwelela meeji, bwa ne díbà kanà dyònsò Yèyè neàlwe’s!”

45 Kadi cìvwà cimfikishe ku dyamba ciinè aci, mwwa ngaakula bwà Mwanèètù Bosworth. Pàngààkayà bwà kumòna munsantu mukùlumpè awu, patwàkmvwà ne ùkaavwa ùpùnga ne lufù, ne bidimu makùmi mwandamukùlù ne byà mu njila, mukàjàànyi ne mèmè tupweka batàngìle ku. . .kuntwaku bwà kumumòna kumpàlà kwà yèyè kufwà. Bìvwa bìkèngela ànu mmwambilèku cintu kampànda. Mèmè ntu muswè kubandila bansantu pàdìbo munkaci mwà kubwela mu Butùmbi, nènku bivwa bìkèngela bwà mèmè kumumòna. Ki twètù kwosha lubilu lukolè lwèbè lwà mùsà mu kàshinyi.

46 Kàdi pàngààkafikà kuntwaku, ne kuditwa mu ciibi, ki nkambwà mukùlumpè ewu mudyàdije mu kaaditumba. Kubàndululayè mutù pààkammònàye mbwela apu. Mabòkò èndè makùlākàjì, mazengèle awu mwolola, ne misunya milembèlèle. Ki kungoolwelayè mabòko. Ki mèmè kumuupukila ku nshìngù e kwela lubilà lukole ne: “Taatù wanyì, taatù wanyì, màkalù a mvità a Izàlèèlà, ne babàndì bààwù bàà pa tubalu,” bwalu yèyè ùvwa munsantu, wa difwànà dyà Nzambi.

47 Ki mèmè kwamba ne: “Mwanèètù Bosworth, ndi muswè nkukonkèku cintu kampànda. Udi witabuuja ne neùmvwè bìmpè anyì?”

Yèyè ne: “Kaa, ncyèna nànsha nsaama to.”

Mèmè ne: “Èè, mbwalu kaayì?”

48 Yèyè ne: “Ndi ngaalukila Kumbèlu.” Yèyè ne: “Ndi mucyokè, ne ndi muzengèle. Ne ndi muswè ànu kwalukila Kumbèlu cyaanàanà.”

49 Mèmè ne: “Nànku udi mujingùlùle ne udi upùnga ne lufù anyì?” Mèmè ne: “Ndi muswè nkukonkèku cintu kampànda. Paanyimà pàapa munda mwà bidimu makùmi mwandamutekètè ne byà mu njila byà bwambi, ncikondo kààyi cìvwàku bwèbè wèwè citàmbe kwikala cyà butùmbi? Udikù mufwànyìne kwakula nàanyi anyi, mukalenge, ne kungambila dilabula dyúvwàku mupetè, mu ntàntà yònsò awu, dyúdiku mufwànyìne kubala bu dyèbè díbà dyà ditàmbe kwikala dyà butùmbi.”

50 Bu mèmè mwa kushaala ne mwoyi ne kafika ku bidimu byèndè abi, ncyàdyàkupwàku mwoyi nànsha, mwàkantàngilà mèsù mafìike awu, àntàngidila kuulu kwà bìnetè abi. Yèyè ne: “Mwanèètù munanga, eci ki cikondo cyà citàmbe bunènè cyà mwoyi wànyì. Ncyèna mwà kuvùlukakù cikondo nànsha cìmwè cìkaadiku cyà butùmbi kutàmbe mpindyewu ewu mene to.”

51 Mèmè kumutàngila mu mpalà, e kwamba ne: “Mukalenge, ucìdi ànu mumanyè ne udi munkaci mwà kupùnga ne lufù anyì?”

52 Yèyè ne: “Mwanèètù Branham, ndi mudyádi je mwab’ewu, mwindile kasunsa ne kasunsa kónsò bwà Yèyè kuunzulula ciibi aci ne kulwa, bwà kuyaYè naanyi Kumbèlu.” Ki mùshindù wà kufwà ngwòwò awu. Ki mùshindù wà kuya ngwòwò awu.

53 Nènku bu munùdi bamanyè’s, ne, mu mēbà matwè ku àbìdi nànkù kumpàlà kwà kufwàye. . . Yèyè, ùwà mualaale panshì mu kòmá, munda mwa matùkù mapìte pa àbìdi. Nènku mmwenzè ànu ùpingana mu yèyè, kujuukayè mu cibambalu amu, ne kubangayè kwakula ne mukàjèndè. Pashìishe, dyàkámwè, yèyè kumwèka bu uvwa ne mubidi wà lumwènu. Ki kulabulanganaYè ku byanza, munda mwà díbà dijimà bulubulu anyi bipite apu, ne balundà, bakààvwà bamanè kufwà kùkaavwa bidimu makùmi ànaayi anyi àtaanu, bàvwàye mukùdimwishe mucimà mu èkèleeziyà wèndè. Kulabulanganyè ku cyanza ne mamwèndè ne tatwèndè. Too ne mwàkalwàye. . . mwakùumukà mwoyi mu mubidi wèndè, kudyùpwilayè panshì pà musààmù ne kuyayè mu tulù, mu mabòkò à Mukalenge Yesù. Kakwèna cintu bu kuMusadila, muMwindile ne mwoyi wùzùka to.

54 Nènku pámvwà ngaakula ne muntu ewu pa bwalu ebu, ne mmùlondela dilabula adi, mēmè kwamba nùnkù. Mēmè ne: “Mukalenge, kaa, kabyàkwikalakù byà butùmbi patwàMumòna anyi? Kaa, Yèyè wìkalapù nànsha mwà kulwa leelù ewu’s!”

Yèyè ne: “Mwanèètù Branham, kwikadi ucinyisha bantu mùshindù awu to.”

Mēmè ne: “Udi uswà kwamba cinyi?”

55 Yèyè ne: “Kaa, kùteeci kwambila bantu ne buloba bùlwalwa, anyi ne Kilistò ùlwalwa to. Bidi bibàpampakaja.”

56 “Kaa,” mungààkambà, “to. Ùmfwilèku luse. Bwà aba bàdi baMwindile, s’nduumù lwà lutàmbe kwikala lwà butùmbi lùdìbo bafwànyinekù kutèeleja, ne Yesù ùdi pabwìpi ne kujikula ngoma bwà kulwa kwangata Èkèleeziyà Wèndè.” Bukùlàkàjì nebùshintulukè bùlwe bunsongà. Disànka nedìfidiibwè pamutù pàà dibungama. Mwoyi newùfidiibwè pamutù pàà lufù. Dìbènga-kufwà pamutù pàà difwà, nebishintakajiibwè. Kaa, ncikondo kaayìpù’s wè, bwà kumanya ne Yèyè ùlwalwa!

57 Bàvwa baMwindile. Bàvwa baMutèkèmène. Kàdi pààkalwàYe, tudi tusangana ne kùvwa bitùpà bibidì. Cisumbù cimwè civwa citwè ku Cyèndè, ne cikwabo civwa cibèngangana Nèndè.

58 Nènku mùshindù awu ki wutùdi tubisangana leelù ewu. Ki mùdìbi nànkù, misangu yònsò, dilwa Dyèndè ditu ànu dipandulula bantu. Díbà dyònsò, paùdi usangana Yesù, neùsanganè aba bàdi bafwànyine kubèngangana naaCi. Awu’s n’Sàtaana. Nènku, leelù ewu, patùdi twèla meeji ku bwalu abu, katwèna tumòna dishintuluka dyàbùngi to. Ànu byà

mwomùmwè. Bantu mbashintùlùke, kàdi nyumà yà bantu kî mmishintùlùke nànsha.

⁵⁹ Nènku ndekeelu wa byònsò pàakatàpàbo dîsù pambèlu pàà ciibi cyà lupangu e kuMumònabò ùlwa, mubànde pa mpundà mukesè, mutòòke, kabyèna bikèmesha to pàakabangà bayiidi kwela—kwela mbilà ne: “Bukalenge bwà Dyulu bwàlu!” Bantu kuya lubilu bwà katwilangana Nendè, ne Yelusàlèmà mujimà ùvwa mukwacila ku byanza. Kùdi cintu kampànda pa bwalu abu, pàtu Yesù ùlwa, bitu misangu yònsò ànu bisalulangana. Kàdi cimenga cijimà cìvwa cikwàcila ku byanza. Nènku kabèèna—kabèèna mwà kucìsokoka to.

⁶⁰ Nènku byàkàkèngela bwà bayiishi bàà mu ditùkù adi kulumbululabò bwà disaluka adi, bwalu cìvwa mmu difestò dyà paasàkà. Ki kwelabò lubilà lukolè ne: “Ewu Nganyi?” pàvwà mu mpeepèlè mùle tètè, eku dilwa dyà Mukalenge Yesù, ku Yelusàlèmà, dyùjè mpeepèlè ne dindila dyà myoyi yizùka, bimwèke ànu bu ne bìvwa bikèngela bwà balongeshi kumanyabò cìvwa ne cyà kwenzeka aci. Bìvwa bimwèke bu ne mwakwidi munène ùvwa mufwànyine kwikala mucìmanyè. Bìvwa bimwèke bu ne baakwidi bakwàbò bònsò bàvwa bafwànyine kwikala bacìmanyè.

⁶¹ Ne kî mbishintùlùkekù nànsha kakese to, leelù ewu, bwalu Nyumà Mwîmpè ùdi ùdyànjidila Dilwa dyà Mukalenge Yesù. Nènku pàdi Nyumà Mwîmpè ùbanga kwalabala pa buloba bujimà, tupyà twà ditàbuluja ki kubwayikatù eku, myaba yònsò, bimanyinu binènè ne maalu a kukèma mbyenzèke, dyondopiibwa ndyenzèke, bipròfetà mbipàtùke. Mabènesha ònsò masanga à bàpostòlò mmaalukile cyàkàbìdi mu Èkèleeziyà. Pa nànkù, ànu mwàkadibi musangu awu amu, ki mùdìbi kàbìdi mpindyewu, nyumà wa mwena bupidyà ùcidi ànu wèla lubilà ne: “Ewu Nganyi?”

⁶² Bàmwè bàà kùdìbo bàvwa biitàbùjè Mukalenge Yesù, bwà kwamba ne Ùvwa Muntu mwîmpè. Bàmwè bàà kùdìbo bààkamba ne: “Mmuntu mwîmpè.”

⁶³ S’ki cidìbo bàmba leelù ewu. Bàdi bàteeta kuMutèeka bu Napoléon, mulwanganyi wa mvità awu. Bàdi bàteeta bwà kuMutèeka bu—bu George Washington, muntu mwambi wa bulelèlà. Kàdi Yèyè ùvwa mutàmbe aci.

⁶⁴ Nuvwakù batàbàlèèle dibala dyà Mufundu adi anyi? Bààkamba ne: “Ewu m’Mupròfetà udi mufùme mu Ngalèlà.”

⁶⁵ Nènku bàdi bàteeta kwamba cintu cimwècimwè aci leelù ewu, pàdìbo bàmòna nkwaka munènè wa Mukalenge ewu: bwà kwalujulula, ku bukolè bwà mubidi, babèèdi ne beena ntàtu; bwà kuMumòna ùkwàta mudimu ne Nyumà Wendè mu Èkèleeziyà Wendè, bwà kujingulula meeji a bantu; bwà kuMumòna wènza ànu mwàkenzàYe pàvwàYe pa buloba apa, bwà kuuja cyàkambàYe ne necyènzekè aci; cyà bushùwà,

maèkèleeziyà ne bantu mbambè, bèèbeja nùнку ewu: “Ewu Nganyi?”

66 Kabàvwa bumvwè ne Yesù ùvwa nganyi to, bwalu nànsha umwe wa kùdibo kàvwa mwà kuMujingulula, ku bilongelu byàbò to. “Yèyè ewu mmupàtùkile mu sèminèrè kaayi? Mmu cilongelu kaayi cyà tèòlòjì mùdìYe mufùmìne?”

67 Ki mùdìbi kàbìdì leelù ewu. Ciibúngì cyà bantu bàdì balaabiibwe kùdì Nyumà Mwímpè kí mbafùmìne mu sèminèrè nànsha umwe to. Mbipeta byà disungula dyà Nzambì sungasunga. Kàdì bimanyinu ne bishimà, ne maalu à kukèma bìvwà bilàyìibwe mu Bible abi, bìdì bishìndikija Nyumà Mwímpè wa butùmbi ewu pàdìYe ùkwàta mudimu munkaci mwà bantu apa.

68 Kàdì bóbò bàdì bàmba leelù ewu ne: “Mbapàtùkile mu cilongelu kaayi’s?” Paùdì ànu ubwela mu cimenga kampànda, bwà kwenza ditàbuluja: “Wèwè udi wa mu òngumba kaayi?”

69 Mvwa mwenze muiyikì wà bàbìdì mu diitànù amu mu mapingaja, ne nsasseròsè kampànda wa Kàtòlikè kàa cyena Loomo wa mu èkèleeziyà wa ba-Ìrlandais mu Louisville. Nènku mbenzè ànu bāndeeja kùdìye, muntu mulenga mumanyi wa dipòkò, ki yèyè ne: “Mukalenge Branham, wèwè udi mwena òngumba kaayi?”

Mémè ne: “Mémè ncitu nànsha ne òm̀wè to.”

Ki yèyè kwamba, dífà adi ne: “Ukààtukù mujiidibwe mu mudimu wà bwambi anyi?”

Mémè ne: “Èyowà’s, mukalenge.”

Yèyè ne: “Udi mukujidile mu mudimu wà bwambi nganyi?”

70 Mémè ne: “Mukalenge Yesù mmumpè Nyumà Mwímpè, bwà kuyiisha Èvànjeeliyò, ne muntume ne mudimu.” Èè, aci’s ki dijidiibwa dyà mu mudimu wà bwambi didì ditùkèngelà.

71 Kacya Yesù kààkambilakù bayiidi Bèndè ne: “Pàtukàayi nùye ku. . .” Ncyèna ndyula bintu abi to, kàdì bikaadi bijikile matùkù. Kàakamba ne: “Ndààku, ùkalongè bwà kwikala muiyishi, mu bidimu *búngì kampànda*” to.

72 Wàkamba ne: “Shààlaayi mu cimenga cyà Yelusàlèmà, too ne panwàvwàdikiibwà ne Bukolè bwà mu Dyulu.” Aci Wàkacyàmbila bantu bàvwà kabàyi bamanyè kufùnda dìnà dyàbò to. “Ne paanyimà pàa cyòci eci, pàa Nyumà Mwímpè mumanè kulwa pambidi pèènù, dífà adi nenwikalè bantèmù Bàànyì, mu Yelusàlèmà, mu Yudaàyà, mu Sàmaalèyà, ne mu bitùpà byà kuleekùlè byà buloba.” Ki dijiiibwa dyà mu mudimu wà bwambi ndyòdì adi.

73 Katwènakù ne bujaadiki nànsha bùmwe bwà ne Yesù wàkayakù mu cilongelu kampànda, anyì mupetè dipòlomè dyà mu maasèminèrè to. Pàabi, s’kùdì sèminèrè mipite búngì

miibaka mu Dìna Dyèndè, mu twipàcilà twà butèndeledi, kutàmba mùdìbi bwà cintu cìkwàbò cyònsò—cìkwàbò cyònsò cìkààdìku pa buloba ebu. Katùtukù banjì kupeta bujaadiki nànsha bùmwe—nànsha bùmwe bwà ne Yèyè wàkayakù mu kàlaasà to. Kàdì, pààbì, s'kùdì bilongelu bipite búngì biibaka mu Dìna Dyèndè kutàmba mùdìbìkù mu dìnà kanà dyà mushindu mukwabo kanà wònsò dìdìku mwìnshì mwà maulu emu, bilongelu's. Kacya katùtukù bamanyè ne Yèyè ùkaadikù mufunde mukàndà kampànda to. Pààbì, s'kùdì mikàndà mipite búngì mifùnda bwà bwalu Bwèndè kutàmba mikwàbò yìkààdìku mifùndiibwe. Ne, leelù ewu, Bible Wèndè ki Mukànda wà mutàmbe kumanyika wùdìku pa buloba bujimà, munkaci mwà yònsò yà kubala.

⁷⁴ Kàdì, nudi numòna's, mu ditùkù dyà dibàkenketa, bààkeela lubilà ne: "Yèyè Nganyì?"

⁷⁵ Nwamònu's, Nzambi ùtu wàngata cintu cìdì cìmwèka bu cintu cyanààna aci, bwà kucìvwija cintu kampànda. Ki cìdì cyènza ne Yèyè ikalè Nzambi.

⁷⁶ Nènku pààkaMumònàbo ùlwa, ùbwela mubànde pa kabalù mu ciibi aci, bàmwè bàà kùdìbo bàakamba ne: "Yèyè m'Muntu munène."

⁷⁷ Bàtu bàmba nànkù leelù ewu. Kùdì bilongelu byà tèlòlìjì bìdì bilongeshà, leelù ewu ne, Yesù ùvwa Muntu munène, ne Ùvwa Muntu mwìmpè. Bàmwè bàà kùdìbo bàdì bàmba mene ne Ùvwa mupròfètà. Mpindyewu, piikalàbì ne Ùvwa ànu mupròfètà cyanààna, anyì Muntu mwìmpè, twètù's tudi mu mpèkaatù yètù. Yèyè ùvwa mutàmbe ne mupròfètà. Ùvwa mutàmbe ne Muntu mwìmpè. Nànsha muvwàbì ne, Yèyè ùvwa Muntu mwìmpè. Kàbidì, Ùvwa Nzambi—Mupròfètà. Kàdì Ùvwa mutàmbe ne aci. Ùvwa Nzambi mumwèneshiibwe mu mubidi, bwà kuumusha mpèkaatù.

⁷⁸ Nènku pààkalwàYe, ùbwela mubànde pa kabalù, bantu bààbúngì bàakamba ne: "Yèyè mmwondopi. Kaa, tudi bamòne Ùtábeeja mpofo mèsù. Tudi bamòne Wèndesha cikalàbà. Tudi bamòne Wènza disambila, ne mubidi-kapyà wùmuka pà mwàna." Kàdì, dìbà adi, bàà mùshindù awu bàvwa bàMulonda ànu bà milungu yà màmpà ne mishipà's.

⁷⁹ Ne mùshindù awu ngùdì misùmbà yà bantu leelù ewu, bààbúngì. Kwòkò mwondopi, mòna's, bàdì—bàdì bàMutwa muunyimà, kàdì Yèyè's ùdì ànu—s'ùdì ànu mwaba wà màyì wà mu cipeela. Bòbò basaamè, bàyaaya lubilu, bàmba ne: "Kaa, bu wèwè mwà kuswà, udìkù mwà kunsambidila bwà Mukalenge Yesù àngondòpè anyì?" Nènku pàdìbo ànu bàpàtuka mu lùpitàadi, anyì bùùmuka mu bulaalu bwa disaamà, ki bòbò bàdì bàalukilà buludì mu maalu a pa buloba bàba, bu mùdì mbwa wàlukila ku bilushi byèndè, anyì ngulube ku bitoci byèndè, mùdì Mifundù myambè. Bàdì bòbò bàMulonda ànu bwà cìmpè cidìbo

mwà kupeta kùdiYe aci. Bàdi bàMwangata ànu bu di—dibaya dyà bimfwànyì, anyì—anyì bu cintu kampànda cìdìbo mwà kupeta kùdiYe, kàdi kabàyikù bàtèkemena bwà kuMukwàcila mudimu to. Musùmbà awu wùcìdi ànu mutùngùnùke too ne leelù.

⁸⁰ S'kùvwa beena nsudi citèemà bààkondopiibwà, kàdi umwèpèle ngwàkapingana bwà kuMutùmbisha. Anyì bàvwa dikùmi? Bòbò, umwe wa kùdìbo, ngwàkapingana bwa kuMutùmbisha, kàdi bakwàbò abu bààkaya, babùle kusàkìdila.

⁸¹ Kàdi bu bantu bàà mu Àmèrikè emu, bàdi bondopiibwe ku Bukolè bwà Nzambi abu, bu bòbokù mwà kukùdimuna myoyi yàbò kùdi Nzambi, s'nkufwànyine kwenzeka ditàbuluja dyà dìnyungisha ditùnga edi mu mùshindù wà bàkànga ngànda yònsò yà maalà a kapyà, yìdì mifwànyine... Makàjiinyi a mabùki ne makàjiinyi à wiskí s'mmafwànyine kujimina ku mèsù kwà bantu. Èkèleeziyà's mmifwànyine kuula tètè. Myaba yà dyenzela bikàsà's mmifwànyine kushàala munda mutupù mu dyàlumingu dilòlò. Kàbìdì's nkufwànyine kukùtuka ditàbuluja, mu ditùnga dijimà emu. Kàdi pàdìbo bàmòna cyènzeka, bintu bìdì Nzambi wènzà abi, bacìdi ànu bèèla mbilà mikolè ne: "Yèyè Nganyì? Udi ulwa ewu Nganyì's? Mbafùmìne penyi? Ewu Nganyì? Eci cidì cyènzeka ku bukòokeshi kaayi?"

⁸² Ncyàdyàkupwàku mwoyi to, ku Johannesburg, mu Afrique du Sud. Nciçvwa ànu mfikilakù, tusunsa tutwè ku makùmi àsàtù nàнку, mfùma ku dipàtuka mu ndèke. Mvwa mwenzè matùkù àsàtù à muunyà ne à bufùkù mu kapeepà, mucyòke bikolè mu mùshindù wà nciyikù mwa kucitwàla to. Bòbò—bòbò kuya naanyì ku cipalu cinènè mùvwà bantu binunu makùmi àtaanu anyì àsambòmbò badisangishe nàнку awu. Nèuku ànu ncifikilakù ku cyambilu aku, ki Nyumà Mwímpè... Mèmè kumòna bisè, ùlwa mukòsòlwèle mwab'awu. Nèuku ùvwà ne cimanyinu cifùndapù ne: "Durban." Mèmè kumòna nsongàalùmè mwikàle ùlubakana ne ubàfuka tatwèndè ne mamwèndè, mwikàle ne mukòlò wùmwe mwìpì kùdi mukwàbò bule bwà centimètres dikùmi ne yitaanu anyì makùmi àbi. Ùvwa muvwàle mutèèlù mutòokè, ne màmpìndà makwàte mùpanù. Ki mèmè kumòna nsongàalùmè awu. Mèmè kupingaja cyàkàbìdì mèsù paanyimà. Cikèènà-kumòna aci kuumukaci. Ki pashìishe, ànu mu katanci kakesè cyanàànà, mèmè kumòna Bukènkè abu bulembèlèle pa nsongàalùmè kampànda, lwà mu ndekeelu mwà batèèleji amu. Ki mèmè kutàngila. Mèmè kudyàmbidila ne: "S'nkààdi mumumòne mwaba kampànda." Mèmè kumutàngila, kàdi Bukènkè abu bushààle bwimàne kumutu kwèndè munda mwà tushunsa ndambù. Kàdi mvwa mwindile bwà mwandamunyi kubàkulayè mèyi àvwà àlonà. Dìbà adi mèmè kumòna nsongàalùmè umwèumwè awu mwimàne kuulu, wimansha mabaya èndè a balèma awu panshi,

ki mukòlò wèndè mwípi ne ntàntà wa centimètres dikùmi ne yítaanu awu kulwawù bule bùmwè ne mukwàbò awu.

⁸³ Ki mèmè kwambila Mukalenge A. J. Schoeman; udi mu Butumbi, dilòlò edi. Mèmè kwamba ne: “Mukalenge Schoeman, ambùlùlà ànu mèyi àanyi awu. Ncikeènà-kumòna.”

Yèyè ne: “Bîmpè be.”

⁸⁴ Ki mèmè ne: “Nsongààlùmè udi musòmbè lwà paanyimà paapà muvwàle mutèèlù mutòòkè, ne màmpindà wàwa, ùvwa mufùmìne mu cimenga cìdìbò bàbiikila ne Durban, mu ntàntà wa kilòmèètà binunu bibidì nkàma yìnaayi yà bàkòsolola ditùnga, mu bisè. Ne byàkakèngela bwà kubàfukayè tatwèndè ne mamwèndè, bwà kulwayè. Kàdi yèyè witàbùùji Mukalenge Yesù, ne ùdi ne mukòlò wùmwè mwípi kùdi mukwàbò ne centimètres dikùmi ne yítaanu.”

⁸⁵ Ki nsongààlùmè awu kutùpikayè. Ki yèyè awu, mwimàne mwab’awu, utèeta bwà kwangata mabaya èndè a balèmà awu. Ki mèmè kwamba ne: “Nsongààlùmè wa yààyà, Mukalenge Yesù wàkondòpù.” Ki dyàkàmwè mukòlò wèndè awu kulepawù centimètres dikùmi ne yítaanu ayi, kukùmbanganawù, mùvwà mukwàbò awu. Ki kulwàbò ne nsongààlùmè awu pa cibùmbà cyà ku cyambilu apu, ne bangàngàbukà kumukenketabò mwab’awu. Nudi numòna fòtò wèndè mu mukàndà wànyi’s.

⁸⁶ Mvwa mwimàne mwaba awu ànu katanci kakesè, mèmè kumòna kàshinyi kakesè, kàà màyi à matàmbà kàya lubilu mu njila, ne kàsenunuka. Kukùdimukakù, kutàngila paanyimà, ne kutuutakù mu mucì. Nsongààkàji wa citende, wa nsuki mitòòkòlòke ùvwa. . . mucibùke nyimà. Ki mèmè kwamba ne: “Ndi mmòna kàshinyi kakesè, kàà diikala dyà màyi à matàmbà kàsenunuka kàkaditùuta mu mucì, ne nsongààkàji wa citende wa nsuki mitòòkòlòka ne bidimu biipacila ku dikumi ne mwandamukulu mucibùke nyimà. Ùvwa mu mùshindà wà bwalu bukòlè.” Muntu nànsha umwe wa kwandamuna. Kàdi ncìvwa mwà kumumòna mwaba nansha ùmwè mu musùmbà munènè, mwalàbàle wà batèèleji awu to. Ki mèmè kwimana mwaba awu bwà tusunsa tukesè cyanààna. Mèmè kwamba ne: “Umwà. Bidi. . . Kwikadi ne mwoyi mukwàcidile to. M’Mukalenge Yesù, mu Bukòlè bwà dibìikà dyà ku lufù. Yèyè ngudi mutùme Nyumà Mwìmpè bwà kutùngunuka ne mudimu Wèndè.” Ki mwab’awu mèmè kumòna cikèènà-kumòna aci cyènzeka cyàkàbidì. Kàdi ncìvwa mwà kumòna nsongààkàji awu to.

⁸⁷ Ànu pa dìbà adi, ànu kumpàlà kwànyi menemene, ki Bukènkè ebu bwimàne mwaba awu, munùdi bamòne pa fòtò wàwa amu. Ki kwimanaBù apa. Mèmè kwasa lwendu kuyakù, nènku ki yèyè awu mulàdika mwaba awu, kwìnshì kwà cibùmbà cyà ku cyambilu aci. Mèmè ne: “Nsongààkàji, Mukalenge Yesù wàkwondòpù.” Ki kubangayè kudila.

88 Mamwèndè kwambayè ne: “Kaa, to! Kùmwambidiku bwà àjuukè to!” Yèyè ne: “Yèyè ànu munyungè, ùfwafwa.”

89 Ki nsongààkàjì awu kujuukilayè kuulu, wèla mbilà mikolè, ne ùtumbisha Nzambi. Ki maamù awu kuuminyinayè ne kudishindayè mu kalàalu kàvwà mwànà wa bakajì awu mulàadile amu.

Ncinyi aci?

90 Ànu bu pa diine dîbà adi, mudyùdyanganyi mulùme kampànda kujuukilayè lwà paanyimà apu, ne kwimanayè kuulu mutèke dikàsa pa nkwasà, ne dikwàbò pa mu kwàbò, kàdi kwamba ne: “Wèwè, mwena Àmèrikè wè! Ndi nkwela kadyòmbò bwà ùngambile ne mmu Dîná kaayì mùdì wenza eci! Ne udi wa mu dingumba dyà èkèleeziyà kaayì?” Nwamònu anyi?

91 Bidi ànu byà mwomùmwè. Kabèèna bùmvwà to. Bòbò kî mbindile bintu ebi to. Èkèleeziyà kî mmindile Dilwa dyà Mukalenge to. Kàdi Nyumà Mwímpè ùdi kaaba aka bwà kushindika Dilwa Dyèndè, bwà kwenza ne Dyènzekè. Byàbúngi menemene . . .

Muntu ne muntu mmuswè kulonda wendè njila. Ki mùshindù wùvwàbi kuntwaku. Musùmbà ne musùmbà wònsò wùvwà ne wawù mmwènenù sungasunga.

92 Kàdi aci kî mbwalu bùdikù dilòòlò edi to. Ki ncìndì mèmè ngamba to. Kàdi lukonko lùndì mèmè nkwela wèwè, lùdi ne, udi wèwè wela meeji ne Cìdi ncinyi? Ebu mbukusungè. Ewu Nganyi udi ubànda upweka ne matùnga ewu? Kî mbantu to. Bantu kabèèna mwà kwenza abi bintu to. Nganyi Awu udi wakula ne wàmbila bantu mu batèèleji emu, ne: “Mbàsombelè *apa* mene, lwà *apa* nunku,” ne mu myaba mishiileshiiàngàne mu disangisha, pàdìbo bàbwela ne bakàjì ne balùme muneemu emu, biikàle bàpùnga ne lufù apu? Nganyi Awu?

93 Nsongààkàjì wa citende wàbwèdì mu ciinà cyà màyi cyà dibàtiiza mu dindà emu awu, ùvwà kùkaadi mbingu yisàtù, ùpùnga ne lufù ne kansèrè kàà mu dikòba awu, s’mmusòmbèle mu Musèèsù wà Maple emu, dyèndè s’Màndàmù Baity. Ki mèmè kukonka bangàngàbukà bàsàtù bàvwà nendè abu. Kàvwakù nànsha ne mpùngà nànsha umwe wa kushààla ne mwoyi to, wa bwalu ne bàna batekètè bànaayi anyi bàtaanu, ne mààmù wanyi ùteeta bwà kubabèjà. Maman kwambayè ne: “Bill, yèyè kààkwalukilakù kàbìdì kwèndè kumbèlu to.”

94 Ki mèmè kupàtuka kuya kùvwàye ùsanganyiibwa aku, ki Mukalenge Yesù kwakulaYè ne: “EMU MMÙDÌ MUKALENGÈ WÀMBA, yèyè ànu muyè mu èkèleeziyà ne mularayè bwà kubàtijiibwayè mu Dîná dyà Mukalenge Yesù, ne kukwàcila Nzambi mudimu, neàpinganè kwèndè kumbèlu, musàngàle.”

Ki mèmè kumwebeja ne: “Nèwènzè nànkù anyi, inàbànzà?”

95 Ki yêyè ne: “Cyônsò cyûdi wamba aci, mémè nêncyênzè.” Dyàkâmwè bisàama abi kuumukabi. Paanyimà pàa matùkù àsatù, ukàävwa kwèndè kumbèlu, ne bangàngabukà kabèèna mwà kupetakù nànsha kashòonyi kàa kànsèrè aku to.

96 Ewu Nganyì udi ulwa mu Dìna dyà Mukalenge ewu? Yêyè awu Nganyì? N’Nyumà Mwîmpè wa Nzambi. Mmwènenu webè pa Cyôci aci ùdi cinyi? Mmwènenu webè wèwè ùdi cinyi, bu mùdi mumanyè mpaasàta webè? Ne pàdìbo basòmbe mu nkwasà eyi, bantu bàa pambèlù pàa cimenga, basòmbe ne ciseki, basòmbe ne...Muntu mulùme nyêyè ewu musòmbe kaaba aka, mwaba ewu, mwanètù wa ba-Mennonites, kaaba aka mene, mupaluki wa biseki. Kacya ncitukù mumumanyè anyi mumumònekù to, kantu nànsha kàmwè kàa kàmutangila. Kàdi dyàkâmwè, kùkaadi bidimu bitwè ku bibidi, ngeela meeji, anyi cintu bu nànkù, èyo, bidimu bibidi, Nyumà Mwîmpè kuciteela, ne kwamba “EMU MMÛDÌ MUKALENGE WÀMBA.” Kacya katukù mupalùke to kubangila ànu apu. Nganyì Awu? Nganyì Awu?

97 Mukàji ewu ùvwa musòmbe kaaba aka, mu dyàlumingu dishàale edi, musangu wa ndekeelu wûmwà mwab’ewu awu, ùvwa mufùmìne ku mwaba kampànda mu Illinois. Ditùkù dyàkalondà...Ne cyûjà cinenè cyà kansèrè mu mubidi wèndè, ciwà ciikàle cyà lufù. Ne bàmwè bàa ku bangàngabukà bàa mamanya matàmbe bwîmpè mu Illinois bàvwa bàkamufikisha ku lùpitaadi kampànda lunène, bwà kumupandabò, mu òmwè. Ki kudifindayè kulwa. Kacya nciyikù mwanji kumumòna anyi kuumvwa bwalu wèndè to, kacya bàndela. Ki dyàkâmwè, Nyumà Mwîmpè kumubwikilayè ne mundidimbì Wèndè, ne kumwambilaYè ne yêyè ùvwa nganyì, kùvwàye mufùmìne, ne mùvwàye ne cyà kupandiibwa ditùkù òvwà dilondà adi. Mbanganyì bàvwà kaaba aka dîbà adi, bwà kumòna ciinè aci? Ne kumòna mwàkatwàlukidilà nguumù. Ditùkù dyàkalondà, pàakayàye kùdi ngàngabukà, bàakenda nendè ku lùpitaadi ne ku lùpitaadi, kàdi kabàyi mwà kusangana nànsha kàmushoonyi kàa kansèrè to.

98 Ewu Nganyì? Kaa, Nzambi ikàlèkù nèètù luse’s wè! Ewu Nganyì udi wenza ebi ewu? Udikù mufwànyine kupeta dikima dyà kwamba ne ùvwa mmpaasàta webè anyi? Nànsha kakesè. Udikù mufwànyine kupeta dikima dyà kwamba ne bantu bàvwa ne cyà dyanzàmù anyi? Nànsha kakesè. N’Nyumà Mwîmpè, Nyumà uvwa pambidi pàa Mukalenge wetù Yesù awu. Ne Dilwa Dyèndè bwà kuDìsanga ne Èkèleeziyà Wèndè, didi pabwîpi menemene mu mùshindù wà ne Yêyè ùdi munkaci mwà kumwangalaja Bukènkè Bwèndè bunènè bwà cijila, bwà kupikula, ne kubweja mu bwobùmwe, Èkèleeziyà wa Nzambi udi ne mwoyi, bwà Dyambwibwa didi pabwîpi menemene edi. Amen!

⁹⁹ Nganyi Awu? Mémè ncyéna mwà kwandamuna ku lukonko lwèbè to. Ncyéna mwa kukwandamwina to. Kadi ndi mwà kudyandamwina mémè mwinè. Nènkù pa cibàsà cinsantu eci, dilòòlò edi, mu maci mwà aba, musùmbà ewu, ne—ne basùmba ku Mashì à Mukalenge wetù Yesù, ndi ngamba nùnkù ewu byùmukila panshì pàà mwoyi wànyì. Kabiyi ne mbwalu ndi umwe wa ku nwènù to, kì ne mbwalu mémè ndi ànu muntu mushiilàngàne to, kàdi umwe wa ku bapikula bàdi basukùdiibwe ku Mashì. Ndi ngiitabuuja ne Bukènkè bùmwebùmwe bùdi bulembèlèle mu èkèleeziyà emu, dilòòlò edi abu, Bwòbù bùmwebùmwe bùdi bùleejà, ku ngiikàdilù Wabù ne, Bùdi n'Yesù Kilistò, mu mmwènekelu wa Nyumà Mwimpè.

¹⁰⁰ Muntu kanà yònsò udikù mumanyè Mifùndu, mmumanyè ne Yesù wákamba ne: “Ndi mufùme ku Nzambi, ne Ndi nya ku Nzambi.” Kumpàlà kwà kuvwijiibwaYè mubidi, pàvwàYe ne Mòsà mu cipèèlà, Yèyè ùvwa Dikunji dyà Kapyà. Ne pààkajingà Mòsà bwà kuMumòna, Wàkamuleeja bitupà Byèndè byà nyimà. Ki Mòsà kwambayè ne: “Ncifwànàngàne ne Muntu.” PàvwàYe pànu pa buloba apa, Ùvwa Muntu. Wàkenza bintu ànu bimwebimwè bìdiYe wènza ebi, leelù ewu, ùbyènzela ku bantu bàdiYe mupikùle. Ki Yèyè ulwàlwa wàwa ne muDikwàcishe ne fòtò. Ncinyi aci?

¹⁰¹ Paanyimà pàà lufù, dijiikiibwa ne dibìikà Dyèndè dyà ku lufù, Pòlò ùvwa mu njila mutàngile ku Damàsèkè, dingingà ditùkù, ki Bukènkè bunène kumubyànkulabù panshì. Bantu bàvwa bamunyungùlùkile abu kabààkamòna Bukènkè abu to. Kàdi Bwàkabyànkula Pòlò panhì, mu mùshindu wà ne Bwàkamuvwija mpofo. Wàkashààla ne lutàtù ne mèsù èndè matùkù èndè ònsò à mwoyi. Nènkù wákamba musangu kampànda ne: “Bwà ncilu kuditumbisha bwà búngì bwà dibuulula, bààkampèèsha,” dyèbà mu mubidi wèndè, mùsanjeelà wa Sàtaanà, bwà kwikalayè ùmutuuta bisùsù wàmbakaja. Bwalu cìvwa dibòdyodyoka dyà dibuulula.

¹⁰² Nènkù pààkabyànkulàbo Pòlò panshì, pàvwàye mu njila bwà kakèngesha bantu bàvwà bènza mutooyi mupitèpìte búngì abu; musùmba wà bantu balèèdiibwe cyàkàbìdi, bàvwàbo bàbìikila ne mbààbuludyanganyi abu. Pòlò ùvwa mu njila bwà kuya kakèngesha bóbò abu, ne mikàndà mu mpaayà, bwà kubàkwàta ne kulwa naabò ku Yelusàlèmà. Kàdi lwà mu nkànkala wà muunya, Bukènkèi kupweka, bwàkamutuutà panshì, mu malaba, ki kudishìndayè mu lupwishi lwà buloba. Kwàkapàtuka Dìyì mu Bukènkè abu, dyàmba ne: “Shawùlà, Shawùlà, udi uNkèngesha bwà cinyi?”

¹⁰³ Ki Shawùlà kukùdimukayè, mu ngiikàdilù wèndè wa bufofo awu, kubàndishayè mèsù. Ne ùvwa mwà kumòna Bukènkè bunène, bwà butùmbi abu. Ki kwambayè ne: “Mukalenge, Wèwè udi Nganyi?”

104 Yêyè ne: “Ndi Yesù. Ndi mufùme ku Nzambi; Mwya muyè ku Nzambi. Ndi mufùme ku Nzambi; Ndi ngaalukila ku Nzambi.” Yêyè ne: “Mbikolè bwà wêwè kukàndamana.”

105 Dibuuulula dimwèpèle dyà pa lusenga lunsantu alu, musangu ànu wùmwèpèle pa mwaba awu, muntu kèna mwà kushààla wa mwomùmwè to. Muntu, kumpàlà kwà kudìbìikila mùdiye mwena Kilstò, kumpàlà kwà kumònayè mwà kudimanyisha yêyè mwinè, bivwa bikèngela ànji àpetè dilabula dyà paanyimà pàà cipèèla adi, pàdiye mukatwilàngàne ne Nzambi, cimònààmèèsù.

106 Bwalu, leelù ewu, wêwè udi mwà kupeta dyandamuna dyà mùshindù kanà wònsò. Udi mwà kumòna Mukalenge wènzà ànu meneme cyàkambàYe bwà kwenza aci, kàdi beena teòlòjì bàà meeji matwè nebàpetelèPu dyumvwija dyà kudìbingisha naadi. Nebàmbè ne: “Aci cìvwa bwà ditùkù dikwàbò. Cìvwa mbwà *cikampànda*. Anyì ne, Cìdi bwà cikondo cikwàbò. Anyì ne, n’Cyà mafi.” Ànu mwàkambàbo bwà Yesù ne: “Yêyè m’Beelèzèbùlà, dyabùlù. Yêyè mmwena lubùkù.” Nènku bintu byònsò abi, bàdi ne dyandamuna.

107 Kàdi pàdiku ànu muntu ùtwìlangana ne Kilstò, ne ùMumòna mwàkaMumòna Pòlò amu, anyì mwàkaMulabulàye amu, kakwènàkù beena teòlòjì bùngì bukùmbàne pa buloba apa bàdi mwà kunyènga muntu dilabula adi ku dyumvwija to.

108 Ki bwà cinyì, leelù ewu, kabèèna bènza dilabula adi to. Ki bwà cinyì kabèèna mwà kwamba. . . bònsò bàdi bàmba ne: “Ewu Nganyì? Ncinyì Eci? Cìdi cìfùmina penyì?” Kabèèna ne dyandamuna to. Bwà cinyì? Bwalu, cyònsò cìdìbo bamanyè cìdi ànu teòlòjì mukwàatakaja kùdi èkèleeziyà kampànda. Kì “nkumanya kwà teòlòjì” kùdi Mwoyi to. Kì “nkumanya kwà Bible” kùdi Mwoyi to.

109 Kàdi “kuMumanya Yêyè” nkùdi Mwoyi. “KuMumanya Yêyè” bu Musùngidi webè sungasunga, bu Ewu Udi mukuujè tètè ne Bwikadi Bwèndè. Wêwè uvwapù pààkenzekàci. Kakwèna muntu nànsha umwe udi mwà kuKunyèngaCì to. Kakwèna muntu nànsha umwe udi mwà kukunyèngaCì ku dyumvwija to. Pàdi dilabula adi dikwenzekela, wêwè’s udi umanya ne Yêyè ùdi Nganyì. Bwànyì mèmè, Yêyè ùdi Yesù Kilstò umwèumwè awu makèèlèlè, leelù, too ne kashidi.

110 Ewu Nganyì udi wenza bishimà ebi? Ewu nganyì udi wenza byenzedi binène ebi? Mmuyuiishi anyì? Ng’Oral Roberts anyì? M’Billy Graham anyì? N’Jack Schuler anyì? Ng’William Branham anyì? Nànsha yêyè nganyì, kèna ne cyà dyenzemù to. Bòbò mbyamù byà mudimu.

111 N’Nyumà Mwîmpè udi ulwa ne Èvànjeelìyò, mu bimanyinu ne maalu a kukèma ne bishimà, bwà kulongolola cisàmbà. Mpeepèle myùle tètè ne dindila ne myoyi yizùka, ne beena kwitabuuja baMwindile bwà àlwe.

112 Kàdi bakwàbò bàdi bàmbà ne: “Bwà cinyi matàbuluja aa? Citùdi tuàkèbela ncinyi? Tùshaalàayi ànu èkèleeziyà cyanààná.” Mòna’s, bàakamba mu èkèleeziyà emu mene, ne, patwàkabangà kwibaka èkèleeziyà mupyamùpyà, bàmba ne: “Katwèna dijinga ne bishimà to. Katùcyèna kàbìdi dijinga ne bintu abi to. Nwènu naabi dijinga, ndàayi mu budimi bwà bwambi mùdìbi byènzekela. Twètù katwèna naabi dijinga apa to.” Branham Tabernacle pààshàalàye wa ciipanshì mu mùshindù awu, wàpweki ne màyi.

113 Èkèleeziyà ewu mmwibakila pa mèyi-makùlù ne Bukolè ne Èvànjeeliyò wa Yesù Kilstò. Nènku pacìdi ànu tabernacle ewu mwimàne, Nyuma Mwímpè wa butùmbi apetèku mpungà wa kubwela mu misùùkà, bwà kusungila, ne kuuja tètè ne Nyuma Mwímpè, ne kwondopa babèedi. Bwànyi mèmè, n’Yesù Kilstò umwèumwè awu makèèlèlè, leelù, too ne kashidi.

Tùsambilàayi.

114 Wèwè kùyi mumanyè ne Yèyè ùdi Nganyi, kùyi mumanyè cìdi byònsò ebi byùmvwija to, kàdi wèwè muswè kumanya, udikù mwà kwela ànu cianza muulu cyanààná anyi? Ne amba, mu dyela dyà cianza muulu adi ne: “Nsambidilèku, Mwanèètù Branham, bwà mMumanyè.” Nènku Mukalenge anùbènèshè. Ne mu myaba yònsò, ndi mmòna byanza byènu abi.

115 Mpindyewu, Taatù wa mu Dyulu, nyewù tulwa ne Diiyisha edi, ne mamuma a bantu bàdi beelè byanza muulu ne, mbaswè kumanya ne Ewu Nganyi. Mbaswè kwikala bamanyàngàne ne Yesù munène ewu. Bwà ne, Dilwa Dyèndè, dyà dibiikà dyà ku lufù, didi pabwìpì menemene, mu mùshindù wà ne babèedi mbabangè kwondopiibwa. Nènku paanyimà pàa aci cimanè kwenzeka, pashìishe cipròfetà kulwaci mu Èkèleeziyà, pashìishe mapà ne bishima, mpindyewu bitàngile ku cimanyinu cyà ndekeelu aci. Cyàlondà cyà dilwa, n’Dyambwibwa, Èkèleeziyà neikalè mwangàciibwe. Kàdi twètù, Mukalenge, bàtù bajikùlèjìkùle ne tudi baKumanyè mu Bukolè bwà dibiikà Dyèbè dyà ku lufù aba, tudi bindile, ne myoyi yizùka, ne tujinga ne mwoyi mujimà, tudila myadi, tusèngeleela ne: “Lwàkù, Mukalenge Yesù!”

116 Ambùlaaku Èkèleeziyà Wèbè ùye Nendè, ne lùkàsà lwònsò, Mukalenge. Bwalu, àbìdi aa, bantu nebàtaayishè buloba buWakabàfùkìlà bwà bòbò kusòmbelapù, bwàlu mbaKushikùkile. Kì mbalongèku ditalala to, ànu mvità. Kì mbalongèku bwakàne to, kàdi mbalongè ànu dikèbelangana dyà ntàtu. Mùshindù mwinè wùvwàbo kabàyikù bafwànyine kwikala ne nzala yà makolè’s wè! Mukalenge, kaaba kakesè kàdi kabàpèèsha nzala yà bukolè mu mwoyi wàbò aku, ki kàdìbo bàteeta bwà kusànkishila mu cilàmbidi cyà mishindà mu mwaba kampànda, bwà kutaayisha bantu naabà.

117 Nzambi wa yààyà, bìikalàkù ànu mwà kumanya ne bukolè bùdìbò bàjìnga ne mwoyi mujimà abu m'Bukolè bwà dibìikà dyà ku lufù dyà Mwànà wa Nzambi, Bukolè bwà Nyumà Mwimpè bwà kushintulula nsòmbelu yàbò's wè; kabùyi bwà kutaayisha matùnga to, kàdi kushintulula nsòmbelu yàbò ne kubàvwija basadidi Bèèbè.

118 Bantu bààbùngì, bakwàcike ne katombòtombò, bàdi batùbala twètù bu musumbà wa bàdi "kabàyi bamanyè cintu to," ne—ne bu "baabuludyanganyi," mwàkenzàbo mu ditùkù dyà ku mbangidilu amu. Kàdi pààkaalukilàbo, bènda bàcyònkomoka, màKwela twsàkidila mùvwàbo mwà kutwàla bundù bwà Dìnà Dyèbè. Ki njiyà yidi naayi bàna Bèèbè, dilòòlò edi, Mukalenge, myaba yònsò. Tudi ànu ne disànkà cyanàànà.

119 Bàmwè mu ditùkù Dyèbè bààkateeta bwà kuKufwànyikija. Bààkamba ne: "Yèyè mmulundà wa muntu wa mu cisuku wàwa, Yone, udi mufùmìne mu cipèèla muvwàle bilàmbà kabìyi byà nsongo wàwà, mudijìngile ànu kaseba kàà cisèbà cyà kale cyà mùkòòkò awu. Muntu wa cisuku uvwa ulàswilangana mèyi, ku esètè ne ku wesètè awu, wàmba ne: 'Cisuuyi nciètèeka ku muji wa mucì.'" Kwambabò ne: "Yèyè ewu mmu—mmuyiidi wendè. Mmuntu wa cisuku. Mmupàle. Lungènyi Lwèndè kalwèna mu lwòlò to." Mudimu wà bwambi mutàmbe mfùkìlu w'Uvwà naawù awu, Éyi Mukalenge, ngwàkafofomijà mèsù a bòbò abu.

120 Nènku mmubàfofòmòje kàbìdi leelù ewu: Nyumà Mwimpè munène ewu ùdi udyànjidila Dilwa dyà Mukalenge, mwakenzà Yone mu ditùkù dyèndè, ùfofomija mèsù à bantu, aba bàdi kabàyi baswè kumòna abu. Kàdi bwà aba bàdi baswè kumòna abu, Wèwè ngudi mubàsungùle. "Ne bònsò bàdi Taatù muMpèeshe nebàlwe kùNdì," muWàkambà, "ne nànsha umwe wa kùdìbò kààkujìminakù to. Ne Mèmè nèmhubiishè ku lufù ku ditùkù dyà ndekeelu." Tudi tuKwela twasàkidila bwà cyòci eci.

121 Nènku aba bèdi byanza byàbò muulu, dilòòlò edi abu, tudi tulòmba, Éyi Mukalenge Nzambi wa yààyà, bwà Wèwè kuDimanyishakù kùdìbò, mu dilabula kampàndà, mu Bukolè bwà dibìikà dyà ku lufù. Enzàku nàнку, Mukalenge.

122 Ne bakwàbò bàdi mwà kwikala kaaba aka, bàvwà kabàyi beelè byanza byàbò muulu to, kàdi nànsha nàнку, mu myoyi yàbò, bamanyè ne bàvwà naaci dijìnga. Ndi ndòmba bwà Ubàbènèshèku, ne ùbàpèèshè dijìnga dyà mwoyi wàbò.

123 Patùùmukà mu citanda emu, dilòòlò edi, swàku bwà tuye bu bantu bashintùlùke. Swàku bwà tuye ne kiipàcilà kashìilàngàne kutàmba katùvwà nààkù, mu dibwela, pìikalàbi ne kàvwà kabèngàngàne ne diswa Dyèbè dyà Bunzambi. Swàku bwà tùpatukè ne dipàngadika dyà kushààla bakwàte ku nsèngù yà cyoshelu, too ne pìikalà musùukà wètù musànkìshìibwe ne tudi benzè Neebè dilabula, ne tudi bamanyàngàne ne Utùdi twamba awu, bwalu tudi batwilàngàne Nendè ne baMumanyè, ne biikàle

Nendè mu bwobùmwè. Enzàku bintu ebi, Taatù. Ondòpàku babèèdi ne bàdi ne ntàtu.

¹²⁴ Bèshàku mpaasàtà wetù munanga ne wa mushinga mukolè ewu. Nzambi, tudi tulòmba bwà Wikalèku nendè pàmwè ne bânà bààbò bàà bakàji bananga aba, pàdibo bimba Èvànjeeliyò, ne bàMuyiisha ku tudyòmbà twàbò apu.

¹²⁵ Bèshàku beenyi bàdi batwëndèle aba. Mukalenge, swàku bwà bàpatukè, dilòlòlò edi, biikàle ne bujitu mu mwoyi wàbò, ne kiipàcilà kàà ne, kubangila ànu pa dībà edi, bòbò kabàyi baKumanyè, ne kabàyi baKusadilè kwònsò eku to, swàku bwà bàKusadilè. Bamanyè nùnkù, ne: “Bintu bikwàbò byònsò kabyàdyàkwikala ne kwàyàbi to, kadi Dìyì dyà Mukalenge nedishaale kashidi.” Enzaku nànkù, Taatù.

¹²⁶ Tùfwilèku luse, ku mpèkaatù yètù yònsò. Ne swàku bwà twatwilangana mu ditùkù dinène adi... [Katùpà kàà mukàbà wà mèyi munda mutùpù—Muf.]

Bwalu Yèyè wàkannanga kumpàla
Ne wàkampetela lupàndu
Pa mucì wà Kàlvariyò.

¹²⁷ Mpindyewu, paanyimà pàà Diiyiisha edi, twìnyikààyikù ànu mitù yètù cyanàànà bwà kuMukuukwila, patùdì tuMwimbila apa.

Ndi muMunangè,
Ne mwoyi wèbè wònsò.

Ndi muMunangè
Bwalu Yèyè wàkannanga kumpàla
Ne wàkampetela lupàndu
Pa mucì wà Kàlvariyò.

¹²⁸ Mbanganyi bàdiku baMunangè cyà bushùwà? Elà cyanza cyèbè muulu, wàmbe nùnkù bu bujaadiki ne: “Ndi muMunangè.” Kaa, Yèyè kì mmulenga wa dikèma anyì? Nudi bamanyè’s, mèmè ntu munangè ànu kwikala musòmbe mùshindù ewu mwikàle ànu nnwina, mu mùshindù kampànda anyì kansanga, mu Bwikadi Bwèndè. Dìyì Dyèndè, dyàpàtuku, nDimatè mu myoyi. Didi ditùlongolola. Didi ditùfikisha ku dikòokela Nyumà Wèndè. Mùshindù mwinè wùdibi bya kunanga ànu bwa kuMukuukwila’s wè! Mpindyewu, panùdì nuumuka mu èkèleeziyà, dilòlòlò edi apu, ndàayi, nwenda nuMukuukwila.

¹²⁹ Nènkù vùlukàayi ne, lumingu elu, kùdi disangisha dyà milòmbò kaaba aka mu diisàtù dilòlòlò. Kanùpu mwoyi diyiisha dyà Mwanèètù Neville dyà ku tudyòmbà dyà mu dyàlumingu, anyì mu diisambòmbò, pa dībà citèemà jaajaaja, ku WLRP. Mèmè ntu ànu munangè kubàtèeleja, kàdi nwènu? Tungìmbà tūnaayi, anyì tūsàtù atu, twimba bimpè byà kacya. Mèmè ne mukàjàanyi, ne bânà, tutu tupàtula kasanji kèètù kakesè aku ne—ne tushàala bakàjingè, bwà kutèeleja Mwanèètù Neville ne

diyiisha dyèndè dyà ku tudyòmbà, ne mèyi èndè malenga à dikèma awu, à mùtuye ùzànjika Nzambi udiyè munangè ne mwitabùùje awu. Ncyena ngamba eci bwà . . .

¹³⁰ Nwènu beenyi bàdi kaaba aka, wèwè kùyi ne èkèleeziyà udi bu ne ki kwèbè kumbèlu to, lwà ùdisangè neetù. Ndi nnwàmbila, ncìyi ngamba nùнку ne bwalu yèyè mmusòmbe kaaba aka to. To, mukalenge. Nkàadi mwambàmbe cyôci eci, misangu ne misangu. Ndi munangè Mwanèètù Neville. Eci, dyàmbedi, yèyè mmwena teòlòjî. Cintu cyà kumpàla, yèyè mmwànà wa Nzambi. Cintu cidi cìlondà, ùdi umwèumwè awu ditùkù dyònsò. Ndi mumumanyè kùkaadi bidimu. Kacya yèyè kàtukù mwanjì kushintuluka to, nànsha kakesè. Yèyè ùcidi ànu Orman Neville, musadidi wa Mukalenge Yesù awu. Ne ndi ngeela meeji ne ùdi ne . . .

¹³¹ Dilòlòlò adi, mèmè kubiikila ku tèlefonè, bwà kumwebeja ní kàvwa, mu ndongamu wendè, ní ùvwakù mwà kunshiila mpungà wa mèmè kulwa kusambidila babèèdi. Kùvwa bàmwè bàvwà bàlwa, bàlwà mu dinda emu, nudi bamanye's. Ki mukàjèndè mukesè awu kwandamunayè ku tèlefonè, kàdi mèmè mvwa nyiikilangana ne mukàjàanyi, lwà paanyimà pààpa, pa bwalu abu.

¹³² Ne mùshindù mwinè wutùdi twela Nzambi twasàkidila bwà mwinè mukàjèndè mukèsè mulenga kwísù ewu ne bwà díkù dyèndè. Abi's mbilenga be. Paùdi umòna mwambi ne mukàjèndè bènda mu dyumvwangana mùshindù awu, mu kalolo ne didipwekesha, aci's cidi ànu cyènta ne èkèleeziyà àtambè kwenda bìmpè mùshindù awu. Abi's mbitàme ànu kwikala byà kalolo pàdi matùkù ènda àya apa.

¹³³ Nudi baMunangè ne mwoyi wènu wònsò anyi? Èyo. Tutu ne musambu wa ditangalajangana naawù wutùtù twimba wà ne: *Angàtà Dìnà Dyà Yesù Wèndè Naadi*. Nànu tùpèèshaaku kààcyòna kakesè, mwanèètù wa bakàjì, pawikalà nawù mu mukàndà amu. Nènku netwímjàayi musambu wètù wà ditangalajangana naawù awu. Nènku patùdi twimba citùminyì cyà kumpàla, tudi baswè kukùdimuka eku ne eku, kulabulanganakù ku cyanza muntu ne mukwèndè. Èyo. Tùpèèshèku cyonà tung.

. . . Dìnà dyà Yesù wèndè naadi,
Wèwè mwànà wa kanyinganyinga ne dikènga;
Nedikupè disànkà ne busàmbi,
Ndà naaDì kwònsò kùyaayà.

Dìnà dyà musinga, Éyi dyà bupòle be!
Ditèkemena dyà buloba ne disànkà dyà
Dyulu; (Nzambi àkubènèshèku, mwanèètù
wa balùme.)

Dìnà dyà musinga, Éyi dyà bupòle be!
Ditèkemena dyà buloba ne disànkà dyà Dyulu.

Twàngatàayi eci cituminyi mpindyewu:

Twinamina Dîna dyà Yesù,
 Tupòna mikookwela ku makàsà Èndè,
 Mfùmù wa bamfùmù mu Dyulu netùMwasè
 cifulu cyà butùmbi,
 Pààjikà lwendu lwètù. (Aci kacyakwikalakù
 cilenga anyi?)

Dyà mushinga... (Dîna dyà mushinga!) Éyi
 dyà bupòle be!

Ditèkemena dyà buloba ne disànkà dyà Dyulu;
 Dîna dyà mushinga, (Dîna dyà mushinga!) Éyi
 dyà bupòle be!

Ditèkemena dyà buloba ne disànkà dyà . . .

¹³⁴ Mbanganyi bàdi bavùlùke kàamusambu kèètù kakesè
 katùvwà twimba kale wàwa ne: *Kùpù Mwoyi Disambila Dyà Mu
 Dìkù To?* Nudi bakàvùlùke anyi? Ncyèna . . . Thelma, anyi ní udi
 mumanyè aci, anyi cyonà, anyi kwèna mumanyè? Tukàteetaàyibi
 kasangu kàmwè. Kwènaàyi bakàvùlùke anyi? Twànjàayibi . . .
 Pàmwàpà ndi mwà kukàteeta kasangu kamwè neenu.

Kùpù mwoyi disambila dyà mu dîkù to,
 Yesù ùtu muswè kutwilanganamù neebè;
 Yèyè neàtangilè kèèbè kaalu ne kaalu kònsò,
 Kaa, kùpù mwoyi disambila dyà mu dîkù to.


¹³⁵ Mbanganyi bàtuku bènza disambila dyà mu dîkù? Mbîmpè.
 Twànjàayibi kuwùteeta cyàkàbìdi. Nèngwìmbùlùlè kaaba aka.
 Ntu munangè aci. Bònsò cyàpàmwè mpindyewu:

Kùpu—kùpù mwoyi disambila dyà mu dîkù to,
 Yesù ùtu muswè kutwilanganamù neebè;
 Yèyè neàtangilè kèèbè kaalu ne kaalu kònsò,
 Kaa, kùpù mwoyi disambila dyà mu dîkù to.

¹³⁶ Éyi Mukalenge, mbafunde mu Mifundù ne, bàvwa bàngata
 mîshwalà anyi tulùlù twà pambidi pàà Pòlò, ne nyumà
 yà bukooyà yivwa yùmuka pa bantu, ne màsaamà àvwa
 òndopiibwa. Tudi tulòmba, Éyi Mukalenge ne, mùshindù wà
 mwomùmwè awu, bileejiiwbèku pa ebi nùnkù, dilòdòlò edi, pàndi
 mbitùmina bàdi mu lukèngelu ne babèèdi apa. Mu myaba
 kampàndà mu matùngà mwàmwa, mùdi muntu kampàndà
 ne mwoyi wùzùka mwìndile bwà cyòci eci kwenzekaci. Ndi
 ndòmba, Taatù, bwà Wèwè kucifila mu Dîna dyà Yesù,
 Mwân'Èbè. Amen.

¹³⁷ Mpindyewu nèndombè, patùcìdi biinyike mitù yètù apa,
 ní Mwanèètù wa balùme wa mushinga mukolè Smith wàwa,
 wa mu Église de Dieu, utùdi basangàne, ànu mùdi Mwanèètù
 Neville ewu mwab'ewu ne, mmusadidi wa Nzambì udi uneemeka
 bìdiye wàmba, wa lulamatu, ndi muswèku kumulòmba bwà
 ànùlòmbèlèku mabènesha, bwà nwènù kutùngunuka mu
 lumingu lùlwalwà elu. Nzambi anùbènèshè, too ne patwàsangilà
 cyàkàbìdi. Mwanèètù Smith.

[Mwanèètù Smith ùdi ùsambila—Muf.] Èyowa's, Mukalenge. Enzàku nàнку, Mukalenge. Èyowà. Èyowà. Èyowà. Èyowà. Amen.

¹³⁸ Labùlàngànaayi ku cyanza muntu ne mukwèndè. Tudi tunùjingila difika dilenga panwàlwà cyàkàbìdì, mu tabernacle emu. Nzambì ànùbènèshè. 

EWU NGANYI? LUA59-0510E

(Who Is This?)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Ditùkù dyà Baamaamù, mu dyàlumingu dilòòlò, mu matùkù 10 a ngondo mwithànù, cidimu cyà 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org